Published on *Lirica Medievale Romanza* (https://letteraturaeuropea.let.uniroma1.it)

Home > CHASTELAIN DE COUCI > EDIZIONE > A vous, amant, plus k'a nulle autre gent > Edizioni > Lerond

Lerond

I.

A, vous, amant, plus k'a nulle autre gent, est bien raisons que ma doleur conplaigne, quar il m'estuet partir outreement et dessevrer de ma loial conpaigne; et quant l'i pert, n'est rienz qui me remaigne; et sachiez bien, amours, seürement, s'ainc nuls morut pour avoir cuer dolent, donc n'iert par moi maiz meüs vers ne laiz.

II.

Biauz sire Diex, qu'iert il dont, et conment? convenra m'il qu'en la fin congié praigne? oïl, par Dieu, ne puet estre autrement: sanz li m'estuet aler en terre estraigne; or ne cuit maiz que grauz mauz me soufraigne, quant de li n'ai confort n'alegement, ne de nule autre amour joie n'atent, fors que de li - ne sai se c'iert jamaiz.

III.

Biauz sire Diex, qu'iert il du consirrer du grant soulaz et de la conpaignie et des douz moz dont seut a moi parler cele qui m'ert dame, conpaigne, amie? et quant recort sa douce conpaignie et les soulaz qu'el me soloit moustrer, conment me puet li cuers u cors durer qu'il ne s'en part? certes il est mauvaiz.

IV.

Ne me vout pas Diex pour neiant doner touz les soulaz qu'ai eüs en mai vie, ainz les me fet chierement conparer; s'ai grant poour cist loiers ne m'ocie. Merci, amours! s'ainc Diex fist vilenie, con vilainz fait bone amour dessevrer: ne je ne puiz l'amour de moi oster, et si m'estuet que je ma dame lais.

V.

Or seront lié li faus losengeour,

qui tant pesoit des biens qu'avoir soloie; maiz ja de ce n'iere pelerins jour que ja vers iauz bone volenté aie; pour tant porrai perdre toute ma voie, quar tant m'ont fait de mal li trahitour, se Diex voloit qu'il eüssent m'amour, ne me porroit chargier pluz pesant faiz.

VI.

Je m'en voiz, dame! a Dieu le creatour conmant vo cors, en quel lieu que je soie; ne sai se ja verroiz maiz mon retour: aventure est que jamaiz vous revoie. pour Dieu vos pri, en quel lieu que je soie, que nos convens tenez, vieigne u demour, et je pri Dieu qu'ensi me doint honour con je vous ai esté amis verais.

• letto 750 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911 CF 80209930587 PI 02133771002

Source URL: https://letteraturaeuropea.let.uniroma1.it/?q=laboratorio/lerond-5